

**Inatsisartut aalajangiiffigisassaattut siunnersuut Naalackersuisut peqquneqassasut nalunaarusiamik sanassasut, innuttaasut kræftimik suussusersineqarnikunut imaluunniit nappaat inuunermik ulorianartorsiortitsisinnaasumik peqaraanni aningaasatigut toqqissisimanissamik qanoq qulakkeerinniffigisinnaanerigut. Nalunaarusiaq nappaammik eqqugaasut aningaasatigut eqqugaanermi misigisimasaannik imaqassaaq aammattaaq nappaammik eqqugaasimasup ilaqutaasullu aningaasatigut ikiorserneqarnissaanik periarfissaasa maleruagassaanni aporfiusut periarfissaasullu. Nalunaarusiaq UPA 2023 paalitsinnagu Inatsisartunut tunioraanneqareersimassaaq.**

(Inatsisartunut ilaasortaq, Nivi Olsen, Demokraatit)

### **Akissuteqaat**

(Isumaginninnermut Sulisoqarnermullu Naalackersuisoq)

### **Siullermeerinnineq**

Naalackersuisut Inatsisartut ilaasortaq Nivi Olsen, Demokraatineersoq, aalajagiiffissatut siunnersuutaanut qutsavigaat.

Nappaassuit kikkunnik tamanik eqquisinnaasarput, innuttaasunullu ataasiakkaanut annertuunik kinguneqarsinnaasarlutik, ilaatigut aningaasaqarnikkut ajornartorsiutinik, insertitaqannginnerup kingunerisaanik pinngortunik.

Innuttaasut taamatut eqqorneqartut sapinngisamik periarfissaqartariaqarput ikiorserneqarsinnaanermik, isumaqatigiissutitigut aammalu namminerisamik sillimmasiinertigut ikiorneqanngikkaangamik.

Naalackersuisut saqqummiussaqarput pisortanut ikiorsiissutinik aqqissuusseqqinnernik Inatsisartut inatsisissaattut siunnersuummik pisortanut ikiorsiissutit pillugit aamma Suliffissarsiornermut ikiorsiissutit pillugit Inatsisartut inatsisissaattut siunnersuummik UPA 2022-imi saqqummiunneqartunik.

Pisortanit ikiorsiissutit pillugit aammalu suliffissarsiornermut ikiorsiissutit pillugit aqqissuusseqqinnerit ilaatigut isiginiaasuupput innuttaasunik nappaatinik eqqorneqartartunik, taamaattumillu pisortanit ikiorserneqarnissamik pisariaqartitsilersartunik, pisortanit aqqissuusinnerit allat aqutigalugit pilersorneqarnissamut pisinnaatitaanngitsunut. Tamatumani pineqarput timikkut nappaatit taamatullu tarnikkut nappaatit.

Pisortanit ikiorsiissutit aamma suliffissarsiortunut ikiorsiissutit utaqqiisaasumik ikiorsiissutit aqqissuusaaammata inuit nappaammik eqqorneqarsimasut ikiorsiissutinik taamaallaat pisartagaqarsinnaapput peqqisseqqinnissami tungaanut, taamalu suliffeqaleqqinnissami tungaannut, imaluunniit ingerlaavartumik allatigut pilersorneqalernissami tungaanut.

Aqqissuusseqqinnerit siunertaraat innuttaasut nappaammik, ajutoornermik imaluunniit suliffimmi ajoqusernermik peqquteqartumik insertitaminnik annaasaqartut nammineq angerlarsimaffiminniiginnartarnissaat, inuunerminnillu sapinngisamik nalinginnaasumik ingerlatsiinnartarsinnaanissaat.

Taamaattoq suliffissarsiortunut ikiorsiissutit pisortaniillu ikiorsiissutit pillugit aaqqiissutini taaneqanngitsunik allanik pisoqarsinnaavoq, taakkua erseqqissarneqarnissaat attuumassuteqarsinnaalluni.

Taamatut oqaaseqarluta Naalakkersuisut inassutigaat siunnersuutip akuerineqarnissaa.